

zuzendariari

(0034) 943 300 222

OHARRA: Ahalik eta iritzi gehienek izan dezaten tokia, ez da komeni makinazko 15 lerro baino luzeago idaztea gutun hauetan. Idatzi duenaren izena, telefonoa, helbidea eta NAren zenbakia agertu beharko dira. Laburtu behar izanez gero, zuzendaritzak bere esku du horretarako eskubidea. Erdaraz iristen diren gutunak ez dira argitaratuko.

@ zuzendariari@egunkaria.com

✉ Martin Ugalde kultur parkea 20140 Andoain

Itsu eta gor animalien torturaren aurrean

Lide Treku Urreta • DONOSTIA

Gure gizarteak duen bizitzeko erak bultzatuta, animaliek jasaten duten sufrimendua konplize gara denok. Egunero milaka animalia hiltzen dituzte tortura latza jasan ondoren, esperimentazio laborategietan azala erreta, itsu, herren, bizkarrezurra hautsita edo beste edozein basakeria jasan ondoren. Garai hauek direla eta, milioika animalia (azeri, bisoi, mapatxe, otso...) hiltzen dituzte larru industrien, teknika beldurgarrien bidez: bizirik daudela larrua kenduz, elektrokutatuz edo mailu batekin joz.

Ezin ahaztu, ordea, haragi-industriak eta granjek darabilten filosofia: «Animalia hau

dirua da, eta ahalik eta teknika azkarren eta merkeena erabiliko dut dirua ateratzeko, nahiz eta horretarako animaliak infernuri gogorrena sufritu behar duen». Hori aldatzea gure esku dago industria horiei boikota eginaz.

Kontsumismoaren tenpluak

Juanma Hernandez Agudo (*Iruñeko Ekologistak Martxan taldearen izenean*)

Gabonak gainean ditugula, kontsumismoak izugarri egiten du gora. AEBetan, kontsumismoaren paradisuari, duela 11 urtez geroztik «ez erosteko eguna» ospatzen da azaroaren 29an. Egun horretan, kontsumismoaren arriskuez ohartarazteko, kontsumi-

tzaile elkarteek, ekologistek eta globalizazioaren kontrakoek sikiera egun batez ez erosteko gonbita egiten dute.

Gabonek, jatorriz esanahi erlijioso duten ospakizun hauek, egun Kapitalismoaren alde latzena erakusteko balio dute. Dirua xahutuz agintariak ekonomia suspertzen dugula sinetsarazi nahi digute. Jokaera horrekin, ordea, Planetako baliabideak agortzeaz gain, herrialde aberats eta pobreen arteko desberdintasunak sakontzen ditugu. Izan ere, herri garatuok Planetako gutxiengo osatu arren, baliabide gehienak guk kontsumitzen ditugu. Ildo beretik, Iruñetik oso gertu, kontsumismoa goratzeko beste Tenplu bat ireki berri dute. La Morea izeneko merkataritza guneak bere ateak ireki zituenetik, asko eta asko bildu dira hara, ziur

asko hiri txiki batean berrikuntzek eragiten duten ikusminak bultzaturik. Gune erraldoi horiek, kafetegi edo zinema aretoen bidez, aisia eta kontsumoa uztartzen dituzte. Hipermarketuetan gertatu bezala, hirian zein inguruetan ondorio kaltegarriak eragiten dituen autoaren gehiegizko erabilpena indartzen da. Bestalde, saltegi handiek oso eredu desorekatzailea sustatzen dute. Lehia gogor eta desorekatu horretan, negozio txiki asko desagerraraztera behartuak daude. Hori ekidite aldera, batetik, agintariak saltegi handi eta txikien arteko oreka babesteko beste arautze bat bilatu behar dute. Bestetik, herritarrok kontsumitzeko erak bestela planteatu beharko genituzke, ingurumenarekiko, osasunarekiko eta planeta osoarekiko begirunez jokatzuz.

montxo



galdeiozu... ?



OSKAR GOÑI

Udalbiltzako Batzorde Eragileko koordinatzailea

Begi onez ikusten dut nazioartean gure herriaren berri izatea. Baina autodeterminazioaren inguruan Euskal Herrian lan gehiago ez al litzateke egin behar?

Mikel Arantzabal (Bergara)

Ezin gara nazioarteari begira jarri, Euskal Herria alde batera utzita. Adierazpen horretatik abiatuz, azken hilabeteotan hitzaldi sortak izan dira Euskal Herrian, autodeterminazio eskubidearen eta beste hainbat eskubideren inguruan eztabaidatzeko, eta, bestalde, Nazioarteko Konferentzia herritar guztiei irekitako Konferentzia izango da, ez soilik Euskal Herrikanpo datozenentzat. Aurrera begira ere, Udalbiltzak euskal eragileekin harremanak egingo ditu, eta autodeterminazio eskubidea izango da harreman horien ardatz, nazioartean egingo den lanarekin batera.

Abenduaren 10etik aurrera **Pantxo Carrere • Kantaria** izango da Galdeiozu ataleko gonbidatua. Bidali zure galderak ordurako. galdeiozu@egunkaria.com

hirusta



Jon Benito

Aterkirik gabe

Parte meteorologikoa ikusi, eta etsipena dator euriarekin eta haize zakarrarekin batera. Aterpe sendoa behar dute gure hezurrek zutik irauteko. Negarrak eta euriak hezetu ditu artikulazio zaharrak. Lehen baino baldarrago, lehen baino zurrunago gabiltzala diotsut. Baldar dabil bere egian itsutu dena, baldar dabil eztabaidaren ahalmenean konfiantzarik ez duena.

Ekaitza datorren bezala dator eraso, gupidagabe, luzaro. Itxaropenerako iragarpenik ez etorkizun hurbilean: hodei ilunak, behe laino itsua eta trumoi eta euria nonahi. Kirtenari estutzeko garai hobe ez den esan dizut, aterkiaren kirtenari heltzeko ez ote den garai hobe. Sentimendurik irrazionalena izango da babesa bilatu beharra, erasoetatik babestu beharra, defendatu beharra. Ezin dut pentsamendurik artikulatu oinak busti bazaizkit baina. Ezin dut gezia zuzen apuntatu birrikak lurrez itotzen bazaizkit. Ezin bi urrats finko egin, irristatzeko beldurrik gabe.

Sinboloak berreskuratzeko Udalbiltzak egin duen deialdiari jarraiki, aterkien museo bat eraiki beharko genukeela iruditu zait. Aterki bat Durangon, aterki bat Gernikan, aterki bat Bilbon, aterki bat erresistentzia bakoitzarengatik. Donostian bildu ziren milaka lagunengatik.

Euria trumilka ari badu ere, patxada berreskuratzeko sasoia da. Aterkia zabaldu, etxera ezkaratzetatik arin itzuli eta apur bat atertzen duenean proposamen berriekin zorrotz irteteko. Gu izan ginen, baina, larunbateko manifestazioan aterkirik eraman ez zuten bakarrak. Fikziozko eguraldi mapetan sinisterik ez, eta batzuetan euria kopetan behera sentitzea ederra bezain latza dela ikasi genuen. Duin eta zintzo genbiltzala iruditu zitzaidan, ez dakit meteorologoek ulertuko duten horrelakorik. Udazken ekaitztsuak uda ederra ekarri ohi du. Hori diote nekazariak Kantabriko parte honetan. Hala sinetsi nahi dut. Baina, badaezpada ere, hemendik aurrera aterkia besapean.